

廟學典禮

771

769

卷之四

廟學典禮

四庫全書珍本初集

史部

政書

類部

商務印書館受教育
部中央圖書館籌備
處委託景印故宮博
物院所藏文淵閣本

詳校官監察御史_臣劉芬

編修_臣程嘉謨覆勘

欽定四庫全書

史部十三

廟學典禮

政書類二

儀制之屬

提要

臣等謹案廟學典禮六卷不著撰人名氏諸家書目皆不著錄核其所載始於元太宗丁酉而終於成宗大德間盖元人所錄也其書襍鈔案牘排綴成編未經文士之修飾故詞多椎朴又原序原目散佚無考亦無從得其

門類幸其年月先後皆有可稽尚可排比成帙謹釐析其文勒為六卷雖繁複之失在所未免而一代廟學之制措置規畫梗概具存頗可與元史相參考如至元六年設學校官一條稱儒學提舉司秩從六品而百官志作從五品各路儒學教授秩八品而百官志作九品至元十九年邵縣學院官職員數一條稱總管府設教授二員學錄學正各二員散

府設教授二員學錄學正各一員而百官志
作總管府教授一員學正一員學錄一員散
府上中州教授一員俱不相合蓋宋濂等修
史之時據其末年之制而大德以前之舊典
則未及詳考也又選舉志稱至元二十八年
令江南諸路學及各縣學內設立小學選老
成之士教之其他先儒過化之地名賢經行
之所與好事之家出錢粟贍學者並立為書

院是明言小學書院設於世祖之時而此書載立小學書塾乃在大德四年以成宗時人記成宗時事不應訛異如是或至元時雖有此議實未及施行至成宗乃補定其規制而史未及詳歟元史一書自開局至告成僅閱八月其間潦草闕畧不一而足諸志尤不賅脩留此一編猶足以見一朝養士之典固考古者所必稽矣其中有當日文書程式後人

不能盡解以致傳寫訛脫者並詳核釐正無
可考者則闕之人名地名官名譯語對音尤
多舛異今皆一一核定俾不失其真以糾向
來流傳之悞焉乾隆四十六年九月恭校上

總纂官

臣紀昀

陸錫熊

孫士毅

總校官

臣

陸

費

墀

膳錄監生

臣

李光緒

膳錄監生

臣

陳

祁

欽定四庫全書

廟學典禮卷一

選試儒人免差

丁酉年八月二十五日皇帝聖旨道與呼圖克和塔拉和坦謬魯博克達扎爾固齊官人每自來精業儒人二十年間學問方成古昔張置學校官為廩給養育人才今來名儒凋喪文風不振所據民間應有儒士都收拾見數若高業儒人轉相教授攻習儒業務要教育人材其中

選儒士若有種田者輸納地稅買賣者出納商稅開張門面營運者依行例供出差發除外其餘差發並行蠲免此上委令斷事官蒙格德依與山西東路徵收課程所長官劉中遍諸路一同監試仍將論及經義詞賦分為三科作三日程試專治一科為一經或有能兼者但不失文義者為中選其中選儒人與各住處達魯噶齊管民官一同商量公事勾當者隨後照依先降條理開闢舉場精選入仕續聽朝命准此

秀才免差發

羊兒年三月初一日欽奉聖旨條畫節該一款應州城裏村子裏的達嚕噶齊官人每過往宣使每已前的聖旨如今也罷了者咱每的聖旨裏和尚每葉爾羌每先生達什愛滿每的體例裏漢兒河西秀才每不揀甚麼差發徭役不教當者秀才的功業習學者說來的聖旨體例裏這的每河西田地裏住坐的高智耀為頭兒秀才每執把行打的聖旨與了也這秀才每鋪馬祇應休

拿者地產物業不揀他每是甚麼休爭奪無體例的氣
力休教到者這秀才每兄弟孩兒每秀才的功業好生
習學者這秀才每却着文字有聖旨不是秀才阿差發
根底趨閃將別人自己休隱藏者別人根底無體例的
氣力休教到者若隱藏無體例氣力到不怕那甚麼他
每聖旨俺的 羊兒年二月二十六日青山子根底有
時分寫來至元十六年二月浙東道提學司齎擎前件
檢會到大興府欽奉聖旨至十月十五日宣慰司開讀

高學士諱智耀字顯道河西中興路人也世為西夏顯族曾祖某擢蕃科第一祖某仕至大都督府尹父某仕至中書右丞相夏設蕃漢二科以取士蕃科經賦與漢等特文字異耳公巍然擢第授僉判未及大用天兵西役夏人舉國歸附公隱處賀蘭山哈千皇帝嘗問西夏故大臣家有賢子孫在者否以公對召見上存撫留公左右公性樂恬退未幾復歸舊隱時庫德太子鎮西涼令民間立傳置士亦與焉衆請於公遂乘驛走千里詣藩府進見難遽陳儒者事適太子懸一筵於木上募有能吹簫者大賞之公應募而前太子大悅公曰本家世業儒粗知音樂兵燼之餘某家樂工尚多存者因公乘驛往取之公遂言西州多士昔皆給復今置傳與編氓等乞與蠲免太子從之公奉旨歸取樂工復往西涼太子喜欲官之公不就受重賞而歸久之蒙克皇帝即位公復以儒人差役事北上奏陳儒者之所能三綱五常治國平天下自古以來用之則治不可一日無者故有

國家蠲其徭役以養成之因備陳堯舜禹湯文武周公孔子之道有補於世非區區技術者所能萬一上曰有是乎此至美之事也前未有與朕言者遂詔漢地河西儒戶徭役悉除之無所與色辰皇帝居潛藩公因帕克巴國師進見首論佛教帝大悅公曰釋教固美矣至於治天下則有儒者之道又反覆論其所以然者帝甚異之有用公意及即位刻符印付公凡漢北河西儒戶悉委公鎮之從公給文以為驗時漢北淮蜀儒人多為驅者公奏曰以儒為驅古無是也帝方以古道治天下宜除之上可其奏命公奉旨以行前後得釋為民者幾三四千人以此忤權勢或愬於上曰高秀才所釋者多非儒也上詰公公對曰譬之於金也有淺深謂之非金不可儒者學問亦有高下謂之非儒亦不可上為之釋然時庶事草創綱紀未張公奏曰前代有御史臺為天子耳目所以肅官常整治具誠不可闕上命宰臣記其事越明年命立御史臺實用公議久之有權臣欲令儒戶